

प्रमुख समाचार –

- 1— राष्ट्रपति द्रौपदी मुर्मू आज आईआईटी भिलाई अउ आयुष विश्वविद्यालय नवा रईपुर के दीक्षांत समारोह म सामिल होइन।
- 2— राज्य सरकार ह निर्माण श्रमिक मन बर तीन ठन नवा योजना सुरू करही।
- 3— प्रधानमंत्री नरेंद्र मोदी काली बिहनिया ग्यारा बजे आकाशवाणी ले “मन की बात” कारीकरम म अपन बिचार साझा करही।

राष्ट्रपति-भिलाई आईआईटी

राष्ट्रपति द्रौपदी मुर्मू ह अपन छत्तीसगढ़ दउरा के दूसर दिन आज आईआईटी भिलाई अउ आयुष विश्वविद्यालय नवा रईपुर के दीक्षांत समारोह म सामिल होइन।

राष्ट्रपति आईआईटी भिलाई के तीसर अउ चौथा दीक्षांत समारोह म सात इन विद्यार्थी मन ल स्वर्ण पदक अउ बछर दू हजार तेइस अउ चौबीस म स्नातक करइया तीन सौ छियानवे विद्यार्थी मन ल उपाधि प्रदान करीन।

ए मउका म राष्ट्रपति ह किहीन कि औपचारिक शिक्षा ग्रहण करे के अंत होवत हे, फेर पढ़े अउ सीखे के इच्छा कभू खतम नइ होना चाही। ओमन किहीन कि भिलाई आईआईटी परिसर ल आधुनिक शिक्षा अउ अनुसंधान सुविधा के संग विकसित करे गेहे अउ एला बनाय म प्राकृतिक संसाधन के उपयोग करे गेहे। राष्ट्रपति ह किहीन कि आदिवासी मनके जीवन सैली ले सीखे के हमन ह भारत के विकास म अपन योगदान दे सकत हन। श्रीमती मुर्मू ह किहीन कि आईआईटी भिलाई डहार ले आदिवासी समाज के प्रगति बर तकनीकी क्षेत्र म करे गे प्रयास सराहनीय हे। आईआईटी भिलाई ह ऐग्रीटैंक, हेल्थटैंक अउ थिंकटैंक म बिसेस रूप ले धियान दे गेहे हवय। आईआईटी भिलाई ह एक ठन बने सोच के संग आगू बढ़त हे अउ इंहा पिछड़ा वर्ग के युवा मन ल गुणवत्ता वाले शिक्षा दे जावत हे। ए संस्थान ह नोनी मनके संख्या अउ भागीदारी बढ़ाय बर घलो कदम उठाय गेहे। राष्ट्रपति ह किहीन कि आईआईटीयन्स मन ह अपन खोज, वैज्ञानिक सोच अउ दूरगामी सोच ले देस अउ दुनिया के प्रगति म अपन योगदान देवत हे।

ए मउका म राज्यपाल रमेन डेका ह किहीन कि आईआईटी भिलाई के स्थापना ले राज्य के तकनीकी उच्च शिक्षा के क्षेत्र म कतकोन बेरा ले होय कमी पूरा होय हे। ओमन ह संस्थान के सबो विद्यार्थी, शिक्षक अउ कर्मचारी मन ले किहीन कि भविष्य म ए संस्थान देस बर बड़ उपलब्धि हासिल करही।

उहें, मुख्यमंत्री विष्णुदेव साय ह किहीन कि आईआईटी भिलाई कैम्पस के आधारसिला प्रधानमंत्री नरेंद्र मोदी डहार ले रखे गे रिहीस हे। ओमन किहीन कि ए समय ह तकनीक के हवय, जउन देस म तकनीक होही ओ देस ह ओतके जल्दी बिकास करही।

राष्ट्रपति-आयुष विवि दीक्षांत

राष्ट्रपति द्रौपदी मुर्मू आज रईपुर के पंडित दीनदयाल उपाध्याय स्मृति स्वास्थ्य विज्ञान अउ आयुष विश्वविद्यालय के तीसर दीक्षांत समारोह म घलो सामिल होईन। जिहां ओमन किहीन कि सबो चिकित्सक मन ल अपन जीवन के कुछेक बछर गंवई क्षेत्र म देना चाही। राष्ट्रपति ह किहीन कि छत्तीसगढ़ जइसन राज्य म जड़ी बूटी के बड़े भंडार हे। एखर उपर सोध होना चाही। ए मउका म राष्ट्रपति ह तैतीस विद्यार्थी मन ल स्वर्ण पदक प्रदान करीन।

राष्ट्रपति-मुक्तांगन

राष्ट्रपति द्रौपदी मुर्मू ह काली नवा रईपुर के पुरखौती मुक्तांगन म राखे गे कारीकरम म आदिम जाति विभाग डहार ले प्रकासित तीन ठन पुस्तक “आदि नारी: आदिवासी महिलाओं की अस्मिता और गौरव गाथा, वन अधिकारों की मान्यता अधिनियम के क्रियान्वयन के लिए मार्गदर्शिका” अउ पोदङ्गुमा पेन के करसाड के विमोचन करीन। ए मउका म राज्यपाल रमेन डेका ह राष्ट्रपति ल पुस्तक भेंट करीन। ए पुस्तक मन छत्तीसगढ़ के जनजातीय संस्कृति, महिला सशक्तिकरण अउ वन अधिकार के सुरक्षा उपर केंद्रित हे।

उहें, राष्ट्रपति श्रीमती मुर्मू ह छत्तीसगढ़ के जनजातीय समुदाय के जीवन –पध्दति, खान–पान, लोक नृत्य, संगीत, लोक वाद्य, कला, रीति–रिवाज, तीज –त्यौहार, अउ दूसर परंपरा मनले बहुत प्रभावित होइन। ओमन ह पुरखौती मुक्तांगन म छत्तीसगढ़ के पारंपरिक वेसभूषा म सजे नर्तकदल के संग फोटो खिंचवाईन।

राष्ट्रपति-छत्तीसगढ़

राष्ट्रपति द्रौपदी मुर्मू अउ राज्यपाल रमेन डेका ह आज रईपुर के गायत्री नगर के जगन्नाथ मंदिर म महाप्रभू श्री जगन्नाथ भगवान के पूजा–पाठ करके देसवासी मन बर समृद्धि अउ सुख–सांति के कामना करीन। ए मउका म मुख्यमंत्री विष्णुदेव साय, केंद्रीय राज्य मंत्री तोखन साहू अउ सांसद बृजमोहन अग्रवाल मौजूद रिहीन। उहें, राष्ट्रपति ह आज मुख्यमंत्री के नवा रईपुर स्थित निवास परिसर म बेल के पउधा घलो लगइन।

जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम “जिले की चिट्ठी” के प्रसारण काली संझा छै बजके 5 मिनट ले छै बजके 10 मिनट तक करे जाही। ए कारीकरम ल प्रदेश के जम्मों आकाशवाणी केंद्र मन ह एके संघरा रिले करही। ए बखत के अंक म “सारंगढ़–बिलाईगढ़” जिला के गतिविधि के बारे म जानकारी दे जाही।

मन की बात

प्रधानमंत्री नरेंद्र मोदी काली बिहनिया ग्यारा बजे आकाशवाणी ले “मन की बात” कारीकरम म अपन बिचार साझा करही। मासिक रेडियो कारीकरम के ए ह एक सौ पंद्रहवां कड़ी होही। कारीकरम के प्रसारण आकाशवाणी अउ दूरदर्शन के जम्मो नेटवर्क म होही। मन की बात कारीकरम आकाशवाणी समाचार के वेबसाइट अउ न्यूज ऑन एआईआर ऐप म घलो उपलब्ध रइही। दूरदर्शन समाचार, प्रधानमंत्री कार्यालय अउ सूचना अउ प्रसारण मंत्रालय के यूट्यूब चैनल म घलो एखर सीधा प्रसारण करे जाही। हिन्दी प्रसारण के तुरते बाद क्षेत्रीय भाखा मन म घलो एला प्रसारित करे जाही।

श्रमिक योजना

राज्य सरकार निर्माण श्रमिक मन बर तीन ठन नवा योजना सुरू करही। जेखर अनुमोदन श्रम मंत्री लखनलाल देवांगन के अगुवई म नवा रईपुर म होय संचालक मंडल के बइठका म ले गीस। ए योजना म श्रमिक मन के लइका मन बर कौसल विकास म निर्माण मजदूर परिवार सशक्तिकरण योजना, श्रमिक मनके लइका मन ल उच्च शिक्षा संस्थान के प्रवेश परीक्षा बर निसुल्क कोचिंग योजना अउ अटल उत्कृष्ट शिक्षा योजना सुरू होही। मुख्यमंत्री निर्माण श्रमिक मृत्यु अउ दिव्यांग सहायता योजना म अब अपंजीकृत निर्माण श्रमिक के घलो कार्यस्थल म मृत्यु होय म उंखर परिवार वाला मन ल एक लाख रुपिया के सहायता रासि दे जाही।

अटल उत्कृष्ट शिक्षा योजना के प्रक्रिया राज्य स्थापना दिवस के मउका म एक नवंबर के सुरु हो जाही। एखर अलावा राज्य के सबो जिला म श्रम अन्न योजना घलो सुरु करे जाही।

सुगम ऐप

प्रदेस म जमीन अउ संपत्ति के दस्तावेज के पंजीयन के प्रक्रिया ल आसान बनाय खातिर “सुगम ऐप” सुरु करे गेहे। नेशनल जेनरिक डॉक्यूमेंट रजिस्ट्रेशन सिस्टम म सुगम मोबाइल ऐप के माध्यम ले प्रदेस के सबो पंजीयन कार्यालय मन म नवा सुविधा सुरु होय हे। ए सुविधा धोखाधड़ी के मामला ल रोके म मदद करही। सुगम ऐप के उपयोग संपत्ति के तीन कोण ले फोटो अपलोड बर करे जाही। जेखर ले संपत्ति के वास्तविक स्थिति ल चिन्हांकित करे जा सकय। ए तकनीक के उपयोग ले दस्तावेज के सुरक्षा म बढ़ोत्तरी होही।

अरुण साव-लोकार्पण

उपमुख्यमंत्री अरुण साव ह आज रईपुर जिला के खरोरा म बीस करोड़ रुपिया ले जादा के लागत के आने-आने विकास काम के लोकार्पण अउ भूमिपूजन करीन। ए मउका म श्री साव ह प्रधानमंत्री आवास योजना- सहरी के लाभार्थी मन ल आवास पूर्णता प्रमाण पत्र सौंपिन। ओमन ह महिला स्व-सहायता समूह अउ प्रधानमंत्री विश्वकर्मा योजना के हितग्राही मन ल चेक घलो दीन।

रायगढ़-हाथी मौत

रायगढ़ जिला म पाछू रतिहा करेंट के चपेट म आय ले तीन झन हाथी मनके मउत होगे। बताय जात हवय कि घरघोड़ा-तमनार वन परिक्षेत्र के सीमा ले लगे क्षेत्र म ग्यारा हजार केवी के तार टूट के गिर गे रिहीस हे, जेखर चपेट म ए तीनो हाथी आ गीन। ए घटना म तीन झन हाथी मनके मउत होगे। घटना के सूचना मिलतेसाठ वन विभाग के टीम ह मउक म पहुंच के जांच सुरु कर देहे।

हल्बी/गोण्डी-समाचार बुलेटिन

काली ईतवार के “हल्बी” अउ “गोण्डी” बोली म समाचार बुलेटिन प्रसारित करे जाही। ए दूनों बुलेटिन आकाशवाणी केंद्र, जगदलपुर ले प्रसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे ले अउ गोण्डी म समाचार बुलेटिन संझा साढ़े छै बजे ले प्रसारित करे जाही।

मौसम

बंगाल के खाड़ी ले आवत नमी के सेति प्रदेस म अवइया चौबीस घंटा म कुछेक जघा म हल्का बरसा होय के अउ गरज-चमक के संग छींटा पड़े के संभावना हे। ए दउरान न्यूनतम तापमान म मामूली गिरावट हो सकत हे।

